

趙恭毅公自治官書類集

趙恭毅公自治官書卷之七目次

長沙何祖柱蒐輯

奏疏

匠班銀兩請於地丁帶徵疏

謝俞提督互叅仍畱原任疏

司道經承楊某等編批索銀疏

題叅長沙府承審鄭某扣剋工食一案遲延職名疏

定命案緝兇處分疏

題覆常通判高鐸調補靖州不便遽議疏

請勒追鄭某受賄保留疏

題請着追董藩司扣剋工食銀兩併勒追鄭某疏
議覆漢民田地賣與土司問擬處分疏

題 瀏陽張縣丞署縣篆重徵虧空起釁激變疏
題年老請休疏

題明大圍堤工歸常通判專管疏

題明六里苗民仍歸鎮谿所乾同知撫管疏

題覆佟藩司做官之處疏

請定接審命盜處分疏

叅華容詹令貪劣疏

請將衡永郴道王僉事陞補臬司疏

題劉定助毆死同宗無服劉魁先不准減等疏

欽差會題李文健等告羅令致死父命疏

題城步苗楊奉楚殺死綏寧苗張德勝等疏

留常德府王守等戴罪供職疏

支剩米石照七錢折徵疏

題捕役林貴誣良民王冒實爲盜疏

請旌節婦鄧氏疏

謝內陞都察院疏

趙恭毅公自治官書類集卷之

奏疏

匠班銀兩請於地丁帶征疏 四十九年正月

題爲詳請匠班銀兩仍歸匠戶辦納以遵舊章以免賠累事該臣看得匠班一項先據安鄉縣呈詳該邑匠班銀兩匠戶逃散遞年捐賠難爲常法緣由到臣臣隨批行布政司查報續據該司詳據岳州府詳請援湖北統入地丁帶征之例等因隨移咨湖北詢查併飭令該司

通行各屬查明詳奪嗣准湖北撫臣抄案咨覆又經檄
行遵照去後茲據布政使佟國勣詳稱催據長靖等九
府州各回稱匠班銀兩自明至今歷有年所匠戶多係
故絕卽間有子孫俱皆改易別業以致每年催徵不足
官民賠累無休咸請援照湖北之例於地丁帶徵以甦
積困等因具詳前來臣查匠班銀兩歸入地丁均攤帶
徵每兩所增無幾今各屬於此項銀兩每年既有官民
賠累之苦相應據詳援例 題請嗣後俱於地丁帶徵
則

國課無虧而官民均得免累矣

戶部議 查湖北此等匠班銀兩先經楚撫年遐齡題請照江浙二省之例改於地丁錢糧內帶徵臣部覆准在案今該撫既稱湖南匠班銀兩照湖北之例歸入地丁均攤帶徵等語應如所題亦歸入地丁錢糧徵收可也奉

旨依議

謝俞提督互叅仍留原任疏 四十九年閏七月

爲恭謝

天恩事竊臣一介微踪叨荷

聖恩破格超擢轉補偏沅巡撫受

恩既深圖報彌切但臣質既庸闇性復迂愚惟以

君父爲心地方爲務如有目擊之重事敢不據實以

上聞然而才識未優愆尤日積若非

聖明之曲宥安能保全以至今臣每一念及宵旦悚惶

不知何以無負 生成稍安夢寐茲

欽差吏部尚書臣蕭 等奉

旨察審提督俞某抽取兵餉總兵官李如松開張典當
各緣由部議應如尚書蕭 等所議將臣革職誠爲允
當乃蒙

皇上恩同覆載明並照臨曲賜寬宥不卽罷斥俾臣革
職仍畱原任間

命之日感激涕零隨恭設香案望

闕叩謝并祇遵任事外臣自顧何人膺茲 異數惟有

感

聖主宥過之仁盡小臣致身之誼矢効涓埃以仰報

高厚於萬一已耳臣謹恭疏 奏謝伏乞

皇上睿鑒施行

司道經承楊某等編批索銀疏 四十九年八月

爲奸胥違法得贓審實按擬詳報事該臣看得楊某乃
湖南布政司衙門之蠹役也熊某汪某劉某乃湖南驛
鹽糧道衙門之蠹役也機乘州縣起解錢糧赴司道請
領批廻司道編號印發楊某等藉端勒索每張批廻要
銀二三錢不等州縣甚爲苦累臣於閏七月二十二日接
卽視事正在拿究聞據布政使佟國勳詳稱經承楊某
自本年四月二十日起至閏七月二十三日止共發批
六百零三張共得銀一百二十兩六錢依監臨官吏求索

准不在法贓擬以杖徒等因又據署驛鹽糧儲道事布政使佟國勛詳稱經承熊某等自本年四月二十四日起至閏七月二十一日止熊某發過批五十一張得銀一十兩二錢汪某發批一十一張得銀二兩二錢劉某發批八十張得銀一十六兩二錢俱依監臨官吏求索准不在法贓擬以杖罪等因前來臣查監臨官吏挾勢求索律計贓准不在法論折半科罪强者准在法論全科今楊某等借緇批名色勒索六十五州縣銀兩合依監臨官吏求索强者准在法論全科楊某得銀一百二

十兩六錢准在法論至死減一等杖一百流三千里熊
某得銀一十兩二錢汪某得銀二兩二錢劉某得銀一
十六兩二錢均應分別杖責俱革役追贓入官楊某蔑
法婪贓內流不足蔽辜應併妻子安插奉天地方居住
至楊某等於四月內編批索銀該管官布政使佟國勳
署驛監根道事布政使佟國勳直至四個月餘臣正在
拿究間始行詳報亦屬不合但既經詳報似應免議臣
謹具 題伏乞

皇上睿鑒施行

刑部議 楊某合依監臨官交挾勢求索所部財物
強者准枉法論至死減一等律擬流但該撫既稱楊
某得贓一百二十兩六錢內流不足蔽辜應將楊某
僉妻發奉天地方安插至祀所責四十板續據該撫
前題熊某等各杖六十今查熊某等准枉法論全科
等語據此劉某合依枉法贓一十五兩杖一百無祿
人減一等律杖九十折責三十五板熊某合依枉法
贓一十兩杖九十無祿人減一等律應杖八十折責
三十板汪某合依枉法贓一兩至五兩杖八十無祿

人減一等律應杖七十折責二十五板俱革役贓銀
照追入官再該撫疏稱楊某等編批索銀布政使佟
某既經詳報似可免議等語查佟某又有續叅二案
議處此案該撫既稱佟某已經詳報應毋庸議等因
奉

旨知道了

題叅長沙府承審鄭某扣克工食一案遲延職名

疏 四十九年八月

題爲永郡最苦舖役濫征號恐作主討蠹清弊恩復舊
例全活役命事該臣看得湖南康熙四十五年分起存
錢粮除漕粮清項外餘俱仰沐

皇恩槩行蠲免其該年舖司各項工食業准部咨行令
於四十四年地丁銀內支給此皆

皇仁浩蕩軫恤苦役不忍枵腹之至意臣隨欽遵轉飭
遵照去後嗣據零陵縣舖司鄧源莖等赴臣具控詞稱

縣書黃國明等扣剋工食緣由隨批永州府訊據黃國明等供稱四十五年秋冬二季工食在布政司衙門請領每兩只發八錢等情臣以舖司工食既有扣剋何以獨據鄧源莖等具控復批按察司備移布政司移提經管庫書廖宗聖訊據供稱四十五年撥補零陵縣秋冬二季工食銀二百八十五兩內扣過銀五十七兩係前任董布政司家人鄭某扣剋等語將鄭某飭發長沙府提犯煩審屢催未據審詳開列遲延職名請叅前來并解庫書廖宗聖到臣供四十五年舖兵工食零陵縣扣

五十七兩零係董前司補還移送按察司轉發零陵縣原日董前司一應事務俱係鄭勲管理支發扣的零陵縣舖兵工食銀五十七兩係鄭某收進內衙等語事關扣剋難置不究除將庫書廖宗聖飭發該司嚴提鄭某質審外臣查此案以康熙四十九年四月十五日飭發鄭某之日起扣至本年閏七月十五日四個月之例限已滿以現在人犯竟不審詳其承審遲延之咎誠不能爲長沙府知府薛琳聲寬也相應指叅以聽部議臣謹具題伏乞

皇上睿鑒施行

定命案緝兇屢分疏

四十九年八月

題爲詳請 題明接緝命犯處分之例以廣

皇仁事該臣看得叛盜重案承緝接緝各官定例處分甚明惟命案兇犯在逃限緝處分例不盡一茲據按察使卽廷棟詳稱湖南人命案件凡兇犯脫逃未獲初照定例六個月限滿先以承緝職名查叅部覆勒限嚴緝至一年限滿無獲卽照年限請叅第勒限緝兇之員內有承緝接緝不同在承緝之官初限再限一叅覆叅猶屬任內所出之事若接緝之員旣非任內所出併令一

限再限一叅再叅兇犯遠颺無獲接緝疊受處分永難
陞轉殊爲可憫詳請 題明更定永爲遵守等因前來
臣查情罪重大莫如叛盜二案承緝接緝叛犯定例以
三年爲限限內處分之後准其照案緝拿又承緝盜犯
定例一年無獲再限一年通計二年依限叅處亦准照
案緝拿其協緝接緝之員非伊任內所出之事則免叅
處惟兇犯在逃命案處分承緝接緝獨無定限今湖南
定案若兇犯無獲無論接緝與續接緝之員一遇限滿
查叅議處仍令勒緝如不獲仍令限年叅處似此接踵

報叅終無底止且兇犯脫逃勢必遠颺年久月深焉能保其常存臣請嗣後凡人命兇犯脫逃應否照依直隸撫臣條奏以緝獲兇犯之日扣限審結抑或仍以報官之日照命案限期將承緝遲延職名查叅俟部覆至日定限一年緝拿如限滿不獲一次叅處之後卽准照案通緝免其再限覆叅其接緝之員止令嚴緝寬其限年叅處至於殺人兇犯如果藏匿本境該管官員知而容隱不行拿究別經發覺將容隱之官叅處如該管各員委不知情係地方棍徒容隱者止將容隱之人治罪如

先雖容隱後仍自行出首亦准免罪庶殺人兇犯不致
踈縱漏網而承緝接緝之官亦免受無辜之叅罰率土
臣工永戴

皇恩於億萬年矣爲此恭疏 題請仰祈
勅部詳定以便遵行

題覆常通判高鐸調補靖州不便遽議疏 四十九

年九月

題爲楚粵黔蜀漢苗接壤之境守令務在得人仰祈

簡選補授以安地方事該臣查得臣屬湖南近苗地方

案准部議令於本省品級相當揀選熟悉風土廉能之

員保 題調補奉

旨依議欽遵通行在案誠所以飭吏治而安地方也又
於康熙四十七年六月內准吏部咨爲欽奉

上諭事奉有以後有錢糧盜案及降級罰俸官員不准

題補之

育尤所以核實效而杜規避也臣自奉

旨之後凡遇苗邊缺出若無合例可保之員俱請歸部
選蓋圖治要在得人而人才實爲難得稟遵

明旨無非慎重官方茲署撫臣王度昭以靖州員缺請將
常德府通判高鐸調補誠從苗邊需人起見但查該員
有承緝桃源縣失鞘一案尚未弋獲已屆一年限滿應
否准其調補

洪恩出自

君父微臣何敢遽爲置議再查湖南通計六十五州縣以三十二州縣而訓三十三處之缺實屬不敷臣現據該司確查非苗蚩出沒實關緊要之地方概請仍歸部選以免員缺虛懸不致臨時煩竇俟催覆到日會同督臣詳核具題候

旨定奪

奉

旨高鐸准授靖州知州

請勒追鄭某受賄保釋疏 四十九年九月

爲特叅劣貢劣衿受賄保釋大干法紀仰祈

睿鑒事該臣看得陳某邀衆保釋原任丁憂布政使董
某一案經署撫臣王度昭審明分別戍杖援

赦具 題刷准部覆查董某之母於四十七年四月初

四日在任病故匿至十九日始報丁憂且教家人鄭某

令陳某行賄多人保釋又令衙役袁某探聽在途供應

衆人經解任巡撫趙申喬據實題叅甚確迨鄭某投到

之後陳某等頓改前供明係董某從前畏罪故將鄭某

藏匿及原叅巡撫趙申喬解任後始將鄭某投到希卸
已罪承審各官不將鄭某等刑訊事關匪喪恣職賄買
保留不便草率完結應仍令逐一再加嚴審定擬具題
到日再議等因臣又另委寶慶府知府劉民瞻協同長
沙府知府薛琳聲嚴審去後茲據按察司卽廷棟詳稱
先據陳某供出董藩司家人鄭某教令保留嚴提日久
而董藩司令伊家人鄭杰頂名鄭某投審將保留情事
盡推陳某所爲而陳某見旗人不便夾責不敢質辯隨
亦改供招認今奉部行令將鄭某等刑訊定擬從嚴

訊陳某始將從前投到不係鄭某情弊一一供出轉訊
董藩司之親供及頂鄭某投審之鄭杰俱亦不諱今鄭
某未到難以遽結等因詳解前來臣覆親訊據陳某供
稱邀集保雷董藩司實係鄭某教令從前質訊係伊弟
鄭杰冒名鄭某頂審因見旂人不便夾責只得改供招
認卽質之鄭杰亦堅供如一是董某始將鄭某藏匿抗
不投到繼而假令鄭杰頂名代審今奉部駁又堅不放
出鄭某到官圖擱案件其侮弄問官藐玩法紀至斯已
極查鄭某實屬此案要犯將頂替之人混行取供率結

不獨臣不敢上欺

聖明而董某將來藉口反噬百喙難分相應 題明請

賜

勅部嚴着董某并頂名投到之鄭杰名下勒限追出鄭
某到案審擬

欽案得以早結而承讞可免罪愆矣再照此案頂名投
到改供招認之處長沙府知府薛琳聲按察使郎廷棟
始雖不能審明假頂情由今復自行審出例得免議合
併陳明臣謹具 題伏乞

皇上睿鑒施行

題請着追董藩司扣尅工食銀兩併勒追鄭某疏

四十九年九月

題爲永郡最苦舖役等事該臣看得原任丁憂布政使董某先經革職蒙

皇上特恩畱任自應洗心滌慮潔已奉公圖稱職業仰報

君父乃當畱任之初遂肆貪婪之舉給發工食每百扣銀二十兩侵收入已苦累官民又將家人鄭某堅匿不出借以諉卸與可吞肥但旣據廖宗聖供稱零陵縣舖

司兵工食扣剋銀五十七兩係董藩司拿出給還則其餘審出扣剋各屬之銀惟於董某是問相應 題請

勅部嚴著董某將扣剋存留銀兩除補還零陵縣舖司五十七兩外餘銀五千五百二十四兩三錢嚴追全完解部充餉仍勒拘鄭某到案質審定擬以結案件至董某扣剋婪贓臣既失覺察於前今若再爲瞻顧徇隱臣罪益深是以不避嫌怨據實陳明臣謹會 題伏乞

皇上睿鑒施行

議覆漢民田地賣與土司問擬處分疏四十九年

九月

題爲田畝侵隱不清等事該臣看得容美土司買墾石門縣老荒田地按則陞科一案經臣咨准部覆檄行布政司查明定議詳報去後茲據布政使佟國勳查議前來臣查漢土田地各有疆界若漢民之田賣與土司不時有侵佔之弊且恐開爭擾之端嗣後若將田地賣與土司比照民苗結親例各杖一百土司准其折贖田價入官田畝變價充餉說合之人減一等杖九十在地保

甲知情不報亦杖九十該管官失察降一級調用該管道府罰俸一年再從前已賣田地嚴責地方官確查如有賣與土司者諭令脩價取贖倘土司刁搆不容取贖許業主控告查係情真竟將田價入官田還原主仍將土司照例治罪如有地棍捏控取贖照例究治田畝仍令變價銀兩給還土司通限六個月限滿該地方官出具印結彙造贖回田畝冊冊并取各業主并結詳請咨部銷案并於年終時飭令該州縣出具並無漢土買賣田地印結通報備案如有失察照例叅處既據該司詳

議臣等覆查無異理合題請仰祈

勅部定議遵行庶漢土各有攸分而地方亦無侵擾之患矣

題叅瀏陽張縣丞署縣篆重徵虧空起爨激變疏

四十九年十月

題爲報明事該臣看得瀏陽縣縣丞張某等詳報該縣里民鍾正文等爲重徵

國賦等情圍繞縣署懸旗罷市緣由先據布政司詳報臣隨批司嚴審解究復據鍾正文等赴臣具控并據瀏陽縣知縣蘇名弼詳稱櫃書蕭嘉昇等同四十七八年兩年舊都差羅貴等五十餘人因署縣縣丞張某交代之際藏匿印串私給納戶將銀入已經該縣於本年七月

內查出侵盜餉銀二百餘兩又張某每都設立都差共五十七名將百姓錢糧哄入私囊隨拘押追不意蠹書蕭嘉昇等串都差羅貴等於九月十一日將城門縣門壅閉要挾百姓不許開市且張某虧空餉銀三百兩係把總吳士弘擔承又士弘自借積穀七十九石無還遣家人催討觸怒把總縣丞隨同巨棍吏員黎君耀譚之美首倡主謀糾唆羅貴等在縣丞衙門創議鼓動閉城塞門要挾罷市各等情到臣臣查瀏陽縣縣丞張某分防瀏陽縣長沙協把總吳士弘既據該縣詳報伊等虧空

餉銀借穀不還催討觸怒卽串巨棍吏員黎君翬譚之
美首倡主謀鼓動閉城塞門要挾罷市均干法紀其是
否實情有無確據除仍飭該司等提拿蠹棍奸民確究
相應一併 題 叅 請

甘肅縣丞張某把總吳士弘革職併吏員黎仕顯譚之
美革去職銜以便與案內棍蠹各犯嚴行究審其瀏陽
縣知縣蘇名弼雖據詳稱蠹書蕭嘉昇等私匿卽串侵
收錢糧押追起釁但據里民控告亦應 題 請 解 任 質

訊研究塞門罷市實情嚴加治罪以懲奸蠹以肅吏治

者也臣謹會題伏乞

皇上睿鑒施行

題年老請休疏 四十九年十月

題爲

主恩難報臣力益衰謹瀝情願休仰祈

聖慈准歸田里無悞地方事竊臣一介庸材謏劣無似
由刑部員外郎告假在籍蒙

恩召見特授浙江布政使隨陞補本省巡撫又調用今
職偏沅巡撫此從來未有之遭逢臣自顧何人膺茲
異數雖竭盡駑駘猶未報稱萬一而臣賦質愚闇秉性
拘迂九載以來罪愆實多若非

聖主之寬恩安能苟延於今日此臣所宵旦瞻

天感泣不能自己者也至本年部議革職誠爲允當又蒙

皇上恩施格外仍畱原任高天厚地未足上擬生成

豈敢重瀆

聖明偷安旦夕惟是臣自服官治事俱係隻身辦理若
一日不能捺筆卽有一日不能發之文移一日不能舉
動卽有一日不能理之案件今臣年已六十有七精力
日耗目力日昏且有臂酸疼每發卽難於操筆右足攣

痛每發卽艱於舉步如再遷延日久必致貽誤地方臣
思巡撫何官湖南何地若以衰老殘軀縻廩祿而荒職
守臣罪益深臣心滋懼非不知犬馬猶思戀

主頂踵不容自愛但臣年已老臣力已衰雖切感
恩之心愧無報 恩之曰是以謹瀝實情貢陳於
君父之前懇祈

皇上俯念封疆重大矜臣之老鑒臣之心凡臣之請准
歸田里倘不卽填溝壑得以草野餘生咏歌於 堯天
舜日之下則啣結 鴻恩於罔極矣

奉

自趙申喬簡任巡撫着照舊職不必以衰老求罷該

部知道

題明大園堤工歸常通判專管疏

四十九年十一

月

題爲堤工已將告竣保固尤賴專管請

勅廳員以期久遠事該臣看得常德府有大園堤一座
併南趕等障周環一百二十里內龍陽縣載田八百零
六頃六十二畝三分三厘零額徵銀三千一百一十一
兩零祇緣田坐低窪四面皆水故創建田塍壘土而成
以禦泛溢而衛田畝迨康熙十四年洪水陡發衝破堤
身前田盡遭淹沒併除丁銀三百三十四兩零又失額

屯田五十一項零無徵屯餉銀二百八十九兩零又武陵縣高磧村水衝堤潰蠲免額銀二百七十五兩嗣值吳逆踞常兵燹蹂躪民不暇修官不及督逃故既裒捍築無人遂漸崩潰洗成患口已於康熙十九年具題部議豁免錢糧在案歷年以來修築無資堤工未舉民乏耕種之地

國少賦稅之輸臣身在地方所心體訪於康熙四十六年據龍陽縣詳據堤民具呈請修查堤內向分設四十號內龍陽縣三十六號武陵縣四號隨飭該府縣設立

堤總堤長委員分督夫工而且按山出夫照夫派土臣
暨司道府州縣各官量助木石之資連年幫修低者益
高薄者益厚似無淹沒之虞漸有種藝之望現委岳常
道併常德府通判督同武陵龍陽二縣并原在工料理
各員通吏計出照數分給務期酌量均平毋許刁棍豪
強紛爭抗阻統俟吏給已定陞墾之日另行確核

題報但新築堤埝之上尚屬虛鬆一經雨打浪洗人畜
踐踏則高者漸低厚者漸薄今日苦築工成豈能保無
頽壞似當特委專員不時親詣圍堤督率堤總堤長周

圍查閱如有低薄立即加幫高厚或遇水發嚴飭催督人夫晝夜巡邏看守務保無虞茲據布政使佟國勳詳請將大圍堤工歸常德府通判專管等因前來相應責令該州判專司堤務不時稽察加意修培慶董理有人而堤工可固百萬生靈永戴

皇恩於億萬斯年矣

題明六里苗民仍歸鎮谿所乾同知撫管疏四十

九年十一月

題爲詳請 題明復業苗民定管轄專撫級以弘

聖朝德化事該臣看得鎮谿有鎮苗軍苗之分鎮苗向
係鎮谿所管撫軍苗即紅苗向係軍子坪長官司撫管
前明以鎮苗令永順司擔承軍苗令保靖司擔承苗仍
叛服無常二土司徒有擔承之名毫無實濟後鎮谿上
六里之苗因與保靖司相近遂歸該土司管轄自 於

康熙二十三年內苗赴鎮谿投見願歸版籍經辰州府

查議六里若歸鎮谿則必題請設官似應仍歸保靖
管轄又於二十七年因永保二司互爭經辰岳兩道會
查以六里地方附近保靖詳允仍歸保靖撫管又於三
十二年內苗民以乘暴歸仁事奔訴永順司轉詳經布
政司辰沅道查明苗民今若歸漢必須題設流官坐
鎮莫若仍歸老土官管理詳經前督撫臣批允因未便
請設專官故暫令該土司約束今紅苗自四十二年撫
攝之後率皆輸誠納糧又題明請設寨長土百戶催
徵巡緝移設道員同知通判兼轄并添撥弁兵鎮防莫

不傾心歸化安耕樂業是以六里苗民麻龍德等有捨
死投光之控不願仍歸土司所管情願改土歸漢當行
布政司移行辰沅靖道辰州府查議委令土弁宋純漢
清查各寨戶口約束編管併據布政使佟國勦等詳據
分防乾州同知蔣嘉猷詳稱康熙四十九年九月內據
土弁宋純漢稟稱據六里苗人龍德思等情願復歸版
圖納糧等情請令土弁宋純漢約束乾州同知管轄臣
查鎮谿所六里苗民從前雖聽保靖司官撫今龍德思
願爲

聖朝編戶歸漢納糧似難阻其歸誠相應准令復業但宋純漢土弁微員鎮谿旣設流官應將六里苗民責令土弁專司約束乾州同知管轄辰沅靖道統轄則撫馭得人而苗民永沾

聖化矣除俟該同知查明苗寨戶口造報到日移會鎮筸鎮臣分撥弁兵一體巡防外事關苗民復業相應

題明臣謹會 題伏乞

皇上睿鑒施行

戶部議 應如該撫所題准其責令土弁宋純漢約

東乾州同知管轄辰沅靖道統轄其苗寨戶口地畝
錢糧數目行令該撫作速查明造冊報部查核可也

奉

旨依議

題覆佟藩司做官之處疏

四十九年十一月

題爲提究事康熙四十九年十一月二十三日奉

旨佟某做官如何之處着問巡撫趙某到日再奏欽此
移咨到臣准此臣跪聆

天語仰見

皇上察吏用人一至意誠纖悉不遺而神明遠照者

也伏念臣一介庸愚叨荷

聖恩謬任封疆而且欽承

諭旨

命以力減加耗盡革私徵湖南億萬生靈莫不感祝
萬壽於無疆矣然小廉由於大法臣不敢苛小而縱大
上行斯以下效臣不敢責下而寬上布政使佟某上年
到任之後亦平常供職乃本年上半年允收司庫道錢
糧甚滋物議臣提訊該庫書經承其彈兌需索銀兩盈
千累百各供認有據而佟某並未將衙役犯贓情由詳
報則其失察實難辭咎臣不敢自蹈徇庇故違例附疏
聲明以聽部議至佟某近來數月頗知儆惕勉除陋弊
似已稍安臣謹將佟某做官之處遵

旨振實陳 奏恩威總出

聖裁伏乞

皇上睿鑒施行

請定接審命盜處分疏

四十九年十一月

題爲敬陳末議仰祈 題請

睿鑒以昭畫一以勵人才事該臣看得處分定例承審人命盜案初次遲延者照例議處覆叅遲延者將承審各官革職但在現任遲延者初叅覆叅自難辭咎若接任之員屆滿覆叅照例叅處則從前之承審遲延者限滿雖叅不過罰俸而接任之員接審未久覆叅卽罹革職殊爲可憫嗣後人命盜案除現任承審遲延者一叅再叅仍應照舊處分外如叅後遇事離任其接任之員

接審未久請照承審虧空之例俱以本官到任日期扣
限止照初叅例處分則接審官員得以盡心誠鞠而無
重譴之虞矣又凡因公註誤緣事解任等官有應追銀
兩已經回籍回旗查追必俟此項拖欠銀兩催完始將
原叅承追督催之員各案查銷但回旗回籍之員既有
本旗本籍承追不力之處分又將原叅承追督催各官
不准開復註銷似屬過抑嗣後如遇因公註誤緣事解
任等官有應追銀兩在任所承追督催未完者照舊叅
處外如有力不能完已經回籍回旗官員該督撫將未

完銀兩細數造冊送部轉交該籍督撫該旗都統查變
家產追補若屆限無完卽照例將該籍該旗承追督催
各官查叅其原叅承追督催各官既有追催之責應於
咨部轉交該籍該旗變產追補之日卽行詳請開復註
銷則原叅各官不致坐受叅罰而有奮勉之思矣凡此
定例雖遵行已久而一爲變通則接審與承審不同原
叅與承追亦異有應得之處分固所以專責成而酌可
寬之條例亦所以惜人才茲據該司呈詳臣覆加酌議

相應 題請仰祈

皇上睿鑒勅部議覆以便遵行

叅華容詹令貪劣疏 四十九年十二月

題爲縣令違禁私派特揭詳請 題叅以肅官箴事該
臣看得湖南地方向苦私派累民臣仰遵盡革私征之
諭旨嚴行飭禁務期陋弊悉除與民休息以無負

聖主愛養黎元之至意乃不意有岳州府華容縣知縣
詹某者輒敢悖逆功令恣肆私徵於康熙四十九年六
七月間聽信蠹書陳羽仲等指稱田畝科則名目攤派
通縣每糧一石銀六分共計派銀六百餘兩蠹差藍相
一等可証臣訪聞旣確正在繕疏間據司道府各揭報

前來似此私派病民大干法紀誠難一日姑容致貽民
害所當特疏糾叅請

旨將詹某革職并有名蠹役一併嚴提究擬以懲貪劣
而肅官箴者也

請將衛永郴道王僉事陞補臬司疏 四十九年十

二月

爲民命久軫

天心法司實關重任謹據實陳請仰祈

睿鑒事欽惟我

皇上覆育群生恩覃溥海本一體如傷之懷廣泣罪解
網之德每當讞牘之上雖一日萬幾必詳加察核務
期情罪允協不忍一命或寃數十年來其生全於

聖明矜恤之中者固已慶再造而祝萬年矣臣思刑獄

之所係甚大則法司之所任非輕况楚民刁健每架
詞以快私忿若非折獄明允則刑不能無濫施而罰不
必加於有罪今臣屬按察使郎廷棟病故員缺部臣循
次開列自應祇候

皇上睿裁簡用臣何敢冒昧以質

聖聰但臣竊見

皇上圖治之心甚懇需才之念甚切若有所知而不舉
以入 告恐非以人事

君之義查臣屬分守銜永郴道僉事王朝恩愛惜名節

服官廉謹今委署按察司事將及一月存心平恕持議周詳屏絕苞苴聽斷明敏似可膺法司之任倘蒙皇上特恩破格卽以陞補臬司員缺則奉法不致枉民命而明刑可以佐好生臣非不知僉事難以越陞坐名尤爲干禁但臣受

恩深重固不敢徇縱以欺

主亦何敢隱默而蔽賢茲爲官擇人既有所知不得不據實上請應否伏候

聖裁再此係臣一人愚見未便與督臣會疏合併陳明

臣謹恭疏具 題伏乞

皇上睿鑒施行

奉

旨王朝恩着照該撫所請陞補湖南按察使司按察使
該部知道

題劉定助毆死同宗無服劉魁先不准減等疏

十九年十二月

爲報明打死男命事該臣看得劉定助與被毆身死劉魁先乃同宗無服之兄弟也素無嫌怨因屋下首塘角空地係公共之業久爲魁先積糞某年月日定助之父子臣令助亦於彼處開挖糞窖魁先阻論不依次早定助役掘魁先往投戶族歸遇子臣兩相爭論子臣欲掌其嘴魁先推跌子臣仆地頭破血流起扭魁先聲言毆叔定助聞聲奔救見父受傷遂將鋤柄連擊魁先腦後

肩胛脊背脊脊等處定助之兄定取弟定職亦聞聲往
闔並未動手魁先傷重殞命歷訊供認不諱查劉定助
係魁先無服之弟律載同姓親屬相毆五服已盡至死
者以凡人論劉定助應依闔毆殺人律擬絞監候劉子
臣劉定助劉定職均照餘人律各杖一百定職年止十
三照律收贖再照劉魁先與劉定助係無服兄弟式好
無尤緣魁先爭挖糞窖推跌伊父劉子臣頭破血流定
助救父情急以致毆傷劉魁先身死並無欲殺之心應
否俯從末減追理以廣

皇仁伏候

睿裁茲據署按察司事銜永柳道僉事王招解前

來臣覆核無異理合具題伏乞

皇上睿鑒勅下三法司核擬施行

刑部議查律內並無收父情急以致毆死減等之
條應將該撫所請之處毋庸議等因奉

旨劉定助依擬應絞着監候秋後處決餘依議

欽差會題李文健等告羅令致死父命疏四十九

年十二月

爲請

旨事該臣看得李文健文星吉控稱伊父李琇文加純
致死緣由臣批司審究因原任湘鄉縣知縣羅綸聽信
周朝恒讒譖致死李琇等非羅令到案豈能草率定論
詳經署撫臣王度昭移咨吏部至臣申喬接任後准吏
部咨開命案提審事隸刑部等因臣遵移咨刑部摺奏
奉

旨着爾部賢能官一員將羅綸帶去會同巡撫審擬欽此欽遵臣等公同審據李文健等各爲其父斃獄極口稱冤禁卒張四茂等俱供並無袋砂壓死之事其醫生萬謙果否看病下藥供詞閃爍變換竟不能定何者爲憑張四茂等供十月初五日羅綸把李琇兩次打了七十六板檢看原案李琇李阿呂告稱一日兩次責打六十羅綸實屬無辭李琇以有病之人責打是夜身故羅綸雖無壓死之據不免有酷刑之寔但事犯赦前應聽部議李文健所告壓死之處張四茂等既不招承李文

健自應照誣告死罪未決律杖一百僉妻流三千里至配所加徒役三年但李琇死於酷責是實既死其父又流其子並無兄弟孀母誰倚殊爲可憫應否仰邀

皇上浩蕩之恩從寬減等發落聽候部議至文星吉所告伊父文加純致死情由原由萬勝奇供出禁卒張如升等入禁下手加功是以具控今萬勝奇既不招承是妄供由於萬勝奇而非文星吉之妄告相應免議再王開珩供羅綸說把文加純收監取病呈併陳祖權供王教官說羅綸要處死文加純俱供是恐嚇百姓之語應

免深究萬勝奇等不言實情應照律減二等杖九十徒
二年半餘犯均在赦前應毋庸議再照原審官止據
各犯供詞因羅綸未到無從質証並未定案合併陳明
理合會題伏乞

皇上睿鑒勅部議覆施行

刑部議查李塈等雖係羅綸通詳上司應擬罪之
犯但不合於一日之內兩次連責六十板理應議處
事在屢赦以前免議李文健所告囊砂壓死之處
是虛應杖流加役但既無兄弟孀母無倚應將李文

健責四十板餘罪照例收贖准其畱養文星吉王開
珩應毋庸議萬勝奇等依擬杖徒

奉

肯依議

題城步苗楊奉楚殺死綏寧苗張德勝等疏 四十

九年十二月

爲活殺人命事該臣看得城步縣苗殺死綏寧民苗張
德勝等四命并捉去張勝生唐明元二人一案先因克
苗無獲仇盜未明據按察司開列疎防并限年無獲各
職名具詳經臣先後 題叅部覆議處在案茲據署按
察司事衡永郴道王 審擬招解前來臣覆親訊查
楊奉楚之子楊老四蒙晟和之子蒙老樓因往綏邑中
圍講事不知何人殺死有過客姓蕭告爲張德勝所殺

奉楚等遂帶子楊求通等二十餘人各持鎗標等械前往覓屍爲德勝知覺統衆追趕彼此格鬪并捉去張勝生等至黃送生家殺死楊老晚割去頭顱緣伊父黃俸樓被殺割頭後老晚坐草偷牛送生約衆格殺見穿父褲亦割頭報仇反覆究詰矢口不移除蒙晟和病故不議外楊奉楚糾約多人致傷四命應以首論楊奉楚合依苗民有犯照新例治罪聚衆不及五十人如有殺死人命者將爲首之人擬斬例應擬斬監候但事犯赦前應減一等杖一百流三千里係苗人不便擬流應比

照旗人例枷號兩個月責四十板各追埋塋銀四十兩
給付死者之家楊老晚合依爲從例枷號四十日責四
十板事犯 赦前亦應免罪黃送生爲報父仇殺死楊
老晚合依祖父母父母爲人所殺而子孫不告官司擅
殺行兇人者杖六十律應杖六十仍應於據稟詳報事
案內援 赦另結未獲之楊求通等事屬 赦前亦應
免緝再此案審係是仇非盜原叅疎防各職名相應
題請開復又查律條內稱凡共毆下手擬絞人犯果於
未結之先遇有原謀助毆傷重之人解審中途病故者

准其抵命等語今蒙晟和係與楊奉楚同謀起意尋屍
解審中途病故應照例准其抵命但楊奉楚糾約多人
因尋子屍鬪殺張德勝等四命與毆殺一人者不同蒙
晟和應否准抵楊奉楚可否援赦免罪之處理合一
併陳明聽候部議臣謹具題伏乞
皇上睿鑒勅部議覆施行

奉

旨依議

留常德府王守等戴罪供職疏 四十九年十二月
爲報明事該臣看得常德譟兵一案以

朝廷養士士卒肆行搶掠而且出城站隊勒官索結
誠爲法紀所不容及奉

旨究審承問各官不能審得真情上千處分無可寬貸
臣於此案原任督臣喻成龍具 題亦曾列銜蒙

皇上令臣同

欽差郎中臣吳進恭等會審部覆免議臣方感

恩宥過何敢妄瀆

宸聰但臣忝任封疆受

恩深重有關係地方見聞真確何敢畏跼譴責不陳於
君父之前臣於康熙四十一年前任浙撫時奉

旨前往鎮筸會同

欽差吏部侍郎臣傅繼祖等審理李豐印

關一案十二月二十口事竣起程二十六日道經常德

兵諱甫過一路商民皆稱前日兩次放搶人心皇皇全

賴知府王許同知劉光麟靖五營將弁至堂上責其不
救百姓并諭百姓如再來搶時我們出來救你百姓你

們隨我們與兵所殺兵稍畏懼民得安寧等語比時前撫臣金璽前提臣林本直皆在鎮寧未回城中將弁無一能約束兵丁若非知府王許同知劉兆麟挺身誓衆直折克謀則悍卒驕兵恐更有不可知者未必僅一而再也臣適當其時親歷其地深知其事今王許劉兆麟永審失當誠爲有罪而從前捍禦地方似不可泯伏惟皇上量同天地明並照臨臣下苟有微勞無不曲加採錄若臣有所知而瞻徇緘默不以上聞使盡耿者無所勸而悞公者無所戒恐負

聖主委任封疆之意是以據實直陳仰祈

皇上鑒臣從地方起見應否將二官從寬戴罪供職以
責後效伏候

聖裁非臣所敢擅便也再照此係臣據見聞入 告是
以不敢會同督臣列銜合併陳明臣謹具 題不勝悚
息戰懼之至

奉

旨王許劉兆麟俱革職畱任戴罪効力

支剩米石照七錢折徵疏五十年正月

爲 奏銷康熙四十八年錢糧查叅未完各官事該臣
看得湖南四十八年分支剩米石業據各屬照依原定
部價每石六錢折徵經署撫臣王度昭據冊 奏報嗣准

部咨四十八年分支剩米石及報收長沙城步二縣續
完該年支剩米石俱令照時價折徵解部隨行驛監糧
儲道遵照去後茲據驛監糧儲道副使侯憚詳稱湖南
各屬支剩南秋米石自康熙二十八年起 題定價值
以每石六錢折徵歷年報銷解部後於四十四年報存

支剩米折銀兩部議照折給官俸役食之例行令以每石七錢折徵隨祇遵每石補徵一錢又四十六年支剩米折部示仍照每石七錢折解已經徵收在案及於四十八年十二月內部覆又令照時價折銀其四十八年分支剩米折請部定價未奉部覆各屬將應徵四十八年分支剩及長沙城步二縣續完米石仍照六錢折徵解收貯庫之項原非本色不能照時變價隨遵部文解交今湘鄉縣續完米折亦係每石六錢尙存道庫請將四十八年分已徵起解并徵收湘鄉縣續完及尙有未

完之米仍照四十四六七等年之例每石補徵一錢其
現徵四十九年分支剩米石亦照七錢折徵緣由具詳
前來臣查湖南支剩南秋米石先經原任撫臣興永朝以
湖南產米之鄉民間平價大率五錢若以七錢定折尚
覺過多議以每石折銀六錢民自樂輸等因具 題奉
旨依議通飭遵照在案自康熙二十八年折徵起頻年
以來小民輸將無不稱便迨四十四年分報存米折銀
兩部議照折給官俸役食之例每石作七錢折徵而四
十六年亦照此例折解是六錢之外又已加徵一錢至

四十七年支剩米折部覆已照每石七錢折解又令照時價折銀至令尚未定局其各屬四十八年支剩及續完解部米折并湘鄉縣續完貯庫米折原照題定價值六錢徵解而部覆俱令照時價折銀但南秋二米定例俱於七月初一開徵每年除撥支兵糧外約存剩米五萬餘石應折徵解部此存剩折徵五萬餘石之米該道原無貯米之倉並非徵收本色易銀起解總於兵糧之外卽於開徵時令民間照定價納銀解部克餉價有一定故愚民莫不通曉而胥吏不能爲奸今若照時價

折徵如應徵南秋米石係長衡岳寶靖五府州屬合計
二十七州縣其地方之遠近水陸之通阻不同而田地
之肥磽雨澤之多寡亦不一則彼此米價自有低昂且
民間完納自本年七月至下年五月 奏銷先後既各
殊時價值自無一定若前項支剩米石必令各照時價
折徵竊恐經徵不肖官役任意增減而既徵之後又復
補徵完納苦於零星徵收不無擾累臣思徵輸錢糧均
有定額獨此米折一項雖經 題定六錢折價屢年駁
增究無一定之規相應 題請仰祈

勅部准將湖南四十七八九年分已未起解并報收續完及未完米石仍照四十四六七年之例每石補徵銀一錢其五十年以後支剩米石應否仍照 題定每石六錢徵解卽以近來米價稍貴亦照七錢定價折徵俾章程永定庶官常有遵民易輸將頂祝聖壽於億萬年矣

戶部議 應如該撫所請將四十七八九三年米價仍照四十四五兩年七錢折解至五十年以後米價亦照歷年七錢折徵解部可也

奏

青依議

題捕役林貴誣良民王冒實爲盜疏 五十年正月

爲報明事該臣看得易君安等被刦一案緣王冒實往來周胖子之嬸母何氏家氏夫外出遂爾通姦某年月日晚冒實復尋舊好爲周胖子等捉獲送巡檢責懲而捕役林貴先於十月內曾有王老岩告以拿獲王冒實就知道一語又遇周胖子亦告以王冒實爲歹人林貴等輒將冒實拿獲勒令認盜遲至十二月十二日始行解縣冒實先受林貴逼勒與免刑法致報同夥一十七人妄扳易君楚等共湊一十七人之數迨獲易君楚吊

取王冒實對質君楚畏刑亦照所扳姓名供報及關移蕭三收禁日實又串供夥盜九人再各犯互供又係一十八人展轉誣扳毫無証據歷經研訊不惟王冒實等極口稱冤卽林貴等亦供誣盜不諱林貴楊芳合依將良民誣指爲盜不分首從律均應僉妻發邊衛永遠充軍王老岩周胖子合依誣告人死罪未決律應杖一百僉妻流三千里仍於配所加徒役三年查各犯事在赦前均邀援免但捕役林貴誣良爲盜情罪難寬仍應永戍林勝患病並未同行毋庸議被誣王冒實等槩行

省釋其間實犯盜情事已經責懲亦毋庸議蕭三先於
城步縣屬行劫僧佛會案內已擬斬梟示此案既審無
涉應仍于彼案歸結此案真盜飭緝務獲另結茲據署
按察司事衡永郴道僉事王 省解前來臣覆核無
異理合具 題伏乞
皇上睿鑒勅部議覆施行

奉

旨蕭三着卽處斬梟示餘依議

謝內陞都察院疏 五十年正月

爲恭謝

天恩事竊念臣一介微賤自揣庸愚遭遇

聖明蒙

恩超擢洊歷巡撫而臣才疎識闇愆咎寔多乃我

皇上量同天地德普生成臣罪本應褫革而

皇上仍不忍棄捐臣年已老且衰而

皇上仍不加損廢屢邀

浩蕩之洪慈並無涓埃之寸効撫衷慙疚啟處不遑復

荷

恩綸謬叨異數還臣原職授臣都察院左都御史聞
命感激繼以涕零惟是臣以駑劣之才膺茲風紀之任
何以不負

朝廷何以不辜職守雖殫心竭力砥節奉公恐不足以
報

高厚於萬一耳